

EUSKALTEGIETAN ETA BARNETEGIETAN EUSKARA IKASTEKO DIRU-LAGUNTZAK

1. Diru-laguntzaren xedea.

Diru-laguntza honen xedea da Ibarako bizilagunak euskara ikastaroetan parte hartzera bultzatzea. Hori dela-eta, Ibarako Udalak diru-laguntzak emango dizkie euskaltegi edo barnetegiren batean euskara ikasten ari diren ibararrei.

2. Onuradunak.

Diru-laguntza honen onuradunak izango dira, ikastaroa hasi baino gutxienez sei hilabete lehenagotik Ibaran erroldatutako herritarrak. Ibaran bertan ikasten ari direnek, zein herritik kanpoko euskaltegiren batean euskara ikasten dihardutenek ere, diru-laguntza hau eskatzeko eskubidea izango dute.

3. Baztertuak

Deialdi honetatik kanpo gelditzen dira ondorengoak:

- a) Ebazpen irmo bidez diru-laguntzak edo laguntza publikoak jasotzeko eskubidea galdu dutenak
- b) Konkurtso-deklarazioa eskatu dutenek, edozein prozeduretan kaudimengabe aitortua izan direnak, konkurtso-deklarazioan jada daudenak, esku-jartze judizialera lotutakoak edo konkurtso sailkapen sententzian ezarritako ez gaitasun epea amaitu gabe konkurtso legearen arabera ez gaitutako pertsonak.
- c) Administrazioarekin eginiko edozein kontratu bertan behera uzteko errudun aitortuak izan direnak.
- d) Pertsona fisikoa, merkataritza sozietateetako administratzaileak edota beste pertsona juridiko batzuen legezko ordezkariak izan direnak sartuta daudenean kontratatzeko bateraezintasun kasuren batean, bakoitzean aplikaziokoa den legeria espezifikoren arabera; edo Hauteskunde Araubide Orokorraren ekainaren 19ko 5/1985 Lege Organikoak erregulatzen dituen hautetsi karguren bat izatea.
- e) Egungo xedapenek ezarritako zerga edo gizarte segurantzari buruzko betebeharrak ez betetzea
- f) Zerga egoitza erregelamenduz paradisu fiskal gisa sailkatutako herrialde edo lurralde batean dagoenean
- g) Udal honek emandako diru-laguntzak itzuli behar izateagatik sortutako obligazioak ordaindu gabe dituztenean.
- h) Diru-laguntzak itzultzeko betebeharrean egonik, ordainketa eginda ez dutenek (diru-laguntza itzultzeko prozeduraren zordun gisa).
- i) Diru-laguntzen Lege Orokorraren edo Zergei buruzko Legearen arabera, diru-laguntzak lortzeko aukera ebazpen irmo bidez galduta dutenek.

- j) Entitatearen ordezkariaren baten lege-bateraezintasuna Udaleko langile edo hautetsiekin

4. Bete beharreko baldintzak.

Diru-laguntza eskuratu nahi dutenek honako betebeharrak bete beharko dituzte:

- a) Ibarran erroldatuta egotea, gutxienez ikasturtea hasi baino sei hilabete lehenagotik.
- b) Ikastaroa edo ikasturtea amaitu artean Ibarran erroldatuta jarraitzea.
- c) Euskaltegi edo barnetegiren batean euskara ikastaro batean parte hartzea.
- d) Matrikula ordaindu izana.
- e) Ikastaroa bukatzea eta gutxienezko aprobetxamendua izatea. Hau ikastaroa jaso den Euskaltegiak edo barnetegiak egindako ziurtagiri bidez justifikatuko da.
- d) Gutxienez, %85eko asistentzia izatea.
- e) Diru-laguntzak jasotzeko inolako debekuren batean sartuta ez egotea. Debeku horiek azaroaren 17ko 38/2003 Legearen 13. artikuluko 2. eta 3. ataletan zehaztutakoak izango dira.
- f) Zerga betebeharrak eta Gizarte Segurantzarekikoak betetzen dituela egiaztatzen duen aitorten erantzulea aurkeztea.

5. Diru-laguntzen bateragarritasuna.

1. Oinarri hauetan aurreikusitako laguntzak bateragarriak izango dira bai beste Herri Administrazioek emandako diru-laguntzekin bai erakunde publiko nahiz pribatuek emandakoekin, helburua eta xedea berberak izanda ere.

2. Beste laguntza batzuk jasotzen badira, guztira jasotako diru-laguntza ezin izango da diruz lagundutako jardunen kostua baino handiagoa izan. Horrelakorik gertatuz gero, muga hori gainditzearen, ematekoa den diru-laguntza Oinarri hauen kargura murriztuko da.

6. Eskabideak, dokumentazioa eta aurkezteko epea.

Diru-laguntza eskaerak Ibarako Udaleko Euskara Zerbitzuan aurkeztu ahal izango dira 2017ko ekainaren 12tik uztailaren 28ko eguerdiko ordu bata arte. Egun horretatik aurrerako eskaera guztiak hurrengo deialdian aurkeztu beharko dira.

Eskaerarekin batera honako dokumentu hauek aurkeztu beharko dira:

- a) Eskatera orria, behar bezala beteta.
- b) Nortasun Agiri Nazionalaren kopia.
- c) Matrikularen kopia.
- d) Euskaltegiak egindako ziurtagiria. Bertan honako gorabehera hauek zehaztu beharko dira: Eskatzaileak ikastaroa bukatu eta gutxieneko aprobetxamendua izan duen ala ez, eta asistentzia zenbatekoa izan den (ehunekotan).
- e) Bestelako administrazioei eta erakunde publiko edo pribatuei egindako diru-laguntza eskaeren zein jadanik emandako diru-laguntzen gaineko aitorpena.
- f) Eskatzaileak duen bankuko kontuaren titularitatea egiaztatuko duen agiria.

Udalak beharrezkoa irizten dion informazio osagarria eskatu ahal izango die eskatzaileei eskabidean adierazitakoa egia dela ziurtatzeko.

Diru-laguntza eskaera aurkezteaz bat, eskatzaileak deialdian ezarritako baldintza guztiak betetzen dituela, eta oinarri hauek osotasunean onartzen dituela aitortuko du.

Halaber, eskabidean agertzen diren datu pertsonalak bere baimenarekin hartu direla adieraziko du, eta datu horiei tratamendu automatizatua emateko baimena emango du. Eta era berean, datuak behar bezala baimenduta dauden Udalaren fitxategietan sartzea onartuko du. Horretaz gain, datu horiek erabiltzeko baimena emango du, baldin eta erabilera hori Udalaren kudeaketara mugatzen bada.

Atal honetan aipatutako dokumenturen bat aurkeztu ezean, eskatzaileari hamar eguneko epea emango zaio aurkeztutako dokumentazioa zuzen edo osa dezan. Hori horrela egin ezean, eskaerari uko egiten diola uste izango da, eta beste tramiterik egin gabe, artxibatu egingo da.

Eskatera aurkezteak ez du, berez, diru-laguntza jasotzeko eskubiderik ematen, diru-laguntza orok berekin duen iritzia araberako izaera baitu diru-laguntza honek ere.

7. Diru-laguntza emateko prozedura.

Diru-laguntzak emateko prozedura zuzeneko emakida bidez tramitatuko da.

Diru-laguntzak Tokiko Gobernu Batzarrak hartutako akordioaren bidez emango dira, eta horretarako, gehienez ere, hiru hilabeteko epea izango da.

Gobernu Batzarraren ebazpena, aldez aurretik, Euskara eta Hezkuntza Batzordeak egin duen proposamenean oinarrituko da. Horrela, Euskara eta Hezkuntza Batzordeak, dagokion proposamena egin aurretik, aurkeztutako diru-laguntza eskabideak aztertuko ditu, Euskara Zerbitzuak egindako txosten teknikoari jarraiki.

8. Diru-laguntzaren zenbatekoa.

Diru-laguntza kopurua ikasturteka izango da (irailetik abuztura).

Ibarrako Udalak eskatzaile bakoitzari emango dion diru-laguntza gehienez matrikularen %100a izango da (ez materialarena).

Diru-laguntza hauek emateko, guztira, 6.000 euroko izendapena eginda dago, Ibarrako Udalak 2017 ekitaldirako indarrean duen aurrekontuko 430.335.00.00 zenbakidun partidaren kontura.

Laguntzetarako aurreikusitako diru izendapena goian adierazitako diru-laguntza emateko bestekoa ez bada, diru-laguntzen onuradunen artean, diru-laguntzetarako den gehienezko zenbateko osoaren banaketa proportzionala egingo da.

9. Onuradunen betebeharrak.

Honako hauek dira diru-laguntza honen onuradunek bete beharko dituzten betebeharrak:

- Diru-laguntza gai izan den jarduera bete-betean burutzea.
- Diru-laguntza zertarako eman den, hartarako erabili behar da.
- Ibarrako Udalarari aditzera eman beharko zaio, berak diruz lagundutako jarduera hau burutzeko, onuradunak beste diru-laguntzaren bat eskuratu al duen.
- Onuradunek indarrean dagoen araudian ezarritako betebeharrak orokorrak bete beharko dituzte.

10. Diru-laguntzaren ordainketa.

Tokiko Gobernu Batzarrak dagokion erabakia hartu ostean, diru-laguntzaren zenbatekoa ordainketa bakarrean (%100) ordainduko da.

Ez da justifikaziorik aurreikusten, diru-laguntza ikasturtea/ikastaroa amaitzerakoan ematen baita, eta eskaera egiteko orduan ikasturtea/ikastaroa eginda edukitzea eskatzen baitaie.

11. Ordainketa aurrerakina

Diru laguntza ematen duen organoak, ordainketa aurrerakinak erabaki ditzake onuradunei emandako diru- laguntzetan, diru-laguntza horien jarduketari loturiko finantzazio beharretarako.

12. Emandako diru-laguntzen aldaketak

Emakidaren baldintzak aldatzeak edo onuradunak aitortu gabeko bestelako diru-laguntza edo laguntzaren bat jasotzeak, batera edo bakarka, lagundutako proiektuaren kostua gainditzen bada, diru-laguntzaren ebazpena aldatzea ekarriko du eta jasotako dirua itzultzera behartuko da.

13. Kontrol eta jarraipena.

Oinarri hauetan arautzen den diru-laguntza sistema Ibarako Udaleko kontuhartzailletza departamentuak aurrera eraman dezakeen kontrol finantzarioaren mende egongo da.

Oinarri hauetako onuradunak behartuta daude kontrol finantzarioa egiten duten funtzionarioei lankidetzara eskaintzera eta horretarako eskatzen zaizkien agiriak eta beharrezko informazioa eskuratuko diete.

Jarraipen eta kontrol prozesu horretan oinarri hauetako baldintzak ez direla betetzen ikusten bada, beharrezko neurriak hartuko dira diru itzulketa egin dadin, eta kasua bada, emandako diru-laguntza kobratzeko eskubidea galduko da.

14. Betebeharrak ez betetzea.

Onuradunak deialdi honetan aurreikusten diren baldintzetako bat ez betetzeak, diru-laguntza iraungiaraztea edo gutxitzea ekarriko du. Dena den, Diru-laguntzetarako Orokorra den azaroaren 17ko 38/2003 Legearen 37. artikulua eta harekin bat datorren gainontzeko araudiak xedatzen dutena aplikatuko da.

15. Emandako diru-laguntzaren itzulketa.

Oinarri hauetako diru-laguntzak lotuta daude azaroaren 17ko diru-laguntzei buruzko 38/2003 lege Orokorren itzulketa araubideari.

Elkarte baten aldetik deialdi honetan aurreikusten diren oinarrietako bat ez betetzeak diru-laguntza iraungiaraztea edo gutxitzea ekarriko du. Dena den, Diru-laguntzetarako Orokorra den azaroaren 17ko 38/2003 Legearen 37. artikulua eta harekin bat datorren gainontzeko araudiak xedatzen dutena aplikatuko da.

Jarduera bertan behera geldituko balitz, edo eskaeran jaso zenetik guztiz ezberdina baldin bada, jasotako diru-laguntza itzuli egin beharko da.

16. Erantzukizun eta zigor erregimena.

Oinarri hauetako diru-laguntza sistemaren pertsona fisiko eta juridiko onuradunak lege honen mende daude: azaroaren 17ko 38/2003 diru-laguntzei buruzko Lege Orokorren ezarritako arau-hausteei buruzko erantzukizun eta zigor erregimena.



17. Interpretazioa.

Ibarrako Udaleko Euskara eta Hezkuntza Batzordeak erabakiko du oinarri hauek interpretatzean sor daitekeen edozein zalantza.

18. Ordezko araudia.

Oinarri hauetan aurreikusten ez den guztirako, Herri Erakundeei aplikatu beharreko araudiak dioena beteko da, bereziki, diru-laguntzetarako azaroaren 17ko 38/2003 Lege Orokorrak eta uztailak 21eko 887/2006 Errege Dekretuaz onartutako Legeak zehazten duen Arautegiak diotena hartuko dira kontuan.